



UNIVERSITÄTS-
BIBLIOTHEK
PADERBORN

Universitätsbibliothek Paderborn

Panegyricvs Lvdovico XIV. Regi Pacifico

Cossart, Gabriel

Parisiis, 1654

urn:nbn:de:hbz:466:1-12256



UNIVERSITÄTS-
BIBLIOTHEK
PADERBORN

X XI. 37.

Th. 5796.

XI


23

PANEGYRICVS
LVDOVICO XIV.
REGI
PACIFICO
DICTVS

Lutetiæ Parisiorum in Collegio Claromontano

III. Non. Octob. an. CIC. IDC. LIII.

A GABRIELE COSSARTIO, Societatis IESV Sacerdote.



PARISIIS,
EX OFFICINA CRAMOSIANA.

M. DC. LIV.

CVM PRIVILEGIO REGIS.

• PARISIIS •
EX OFFICINA GRAMOMANIA
M DC LVI



EMINENTISSIMO PRINCIPI
I V L I O
C A R D I N A L I
M A Z A R I N O.

ADITVM ad Regem lau-
des Regiae querunt, C A R-
DINALIS EMINEN-
TISSIME: neque dubito, quin per
te facile impetrent; cum intelligam,
quo & illæ apud te, & tu apud
Regem loco sis. Eas si offeres Pacifico
Principi, nihil offeres non tuum;
a ij

E P I S T O L A.

eoque tuum gloriosius , quod singu-
lari fide ac prudentia fecisti , ut
totum Regis esset. Etenim in multis
tuis preclarisque virtutibus , hae mi-
hi meritò maxima visa est , quod ita
rem administrasti , ut eam Ludouic-
cus gereret ; ita domestica pax à te
illius auspiciis , ab illo tuis consiliis
restituta est : ut omnis ad eum tam
illustris facti gloria in solidum per-
tineret. Fuere priscis temporibus ,
qui decus captarent ex inertia re-
gum , à quibus erant ad imperij pro-
curationem adsciti : deque vilitate
principis , administrī saepe dignitas
creuit. Tu cum Regis educationi
prefueris , cum eius composueris mo-
res , ingeniumque finxeris : maiorem

E P I S T O L A.

non potes , quām ex eius prudē-
tia , fortitudine , humanitate , vir-
tutibus ceteris , gloriam referre. Laus
tua summa est , laudatissimus Prin-
ceps : tuāque censere potes , non ea
tantūm , quorum is auctorem te a-
ctorēmque unum esse voluit ; sed
etiam quæ ipse per sē , nullius ad-
monitu consilioque suscepit. Ita quam-
uis propriis abundes laudibus : eris
tamen Regiarum p̄aconiis multò ,
quām tuarum , ornatior. Has lau-
des , quas mereri per te Rex voluit ,
patere, CARDINALIS EMINEN-
TISSIME , eidem per te à nobis of-
ferri : quas si respuet modestissimus
Princeps , cùm suas agnoscat ; ama-
bit profectō , cùm tuas esse quoque me-

EPISTOLAM

minerit. Tu ne sic eas auersare, quod
tuæ sint; ut non easdem, quia sunt
Regiae, libentissime amplectaris. Vale
Eutetiae Parisorum. XI. Kal. Ian.
an. CIC. CIC. LIII.

E. T.

Addictissimus

GABRIEL COSSARTIVS
è Societate IESV.



PANEGYRICVS
LVDOVICO XIV.
REGI PACIFICO
DICTVS.

QUOD vnum ad summam alacritatem , his scholarum primordiis , desiderari superiore anno visum est, PRINCIPES ILLVSTRISSIMI , vt ciuili concordia constitutâ , in pace atque otio , pacis artes & studia colerentur : id singulari Dei Opt. Max. beneficio concessum , celebritatem affert hodierno diei , lætitiâmque singularem . Nam & eâ tum eramus conditione temporum , vt quamuis aliquid ostendi lucis in illâ caligine cœpisset ; non posset tamen & præsentium malorum sensum , & metum futurorum spes

A

L V D O V I C O X I V .

incerta pacis adimere : & eâ nunc trânquillitate , ac securitate fruimur , vt si nondum externa bella sedata sunt , quæ minùs infesta litterarum studiis experti sumus ; at domestica , quæ pestifera sunt iisdem , penitus oppressa conquieuerint . Atque hoc domesticæ pacis profectum à Christianissimo Rege beneficium , cùm vniuersæ Galliæ sit , & omnium ordinum artiūmque commune : tum proprium certè litterarum est , quæ vigere non possunt , dum armorum vel obstrepuntur fragoribus , vel timore turbantur . Quamobrem ne videantur ingratæ , atque immemores beneficij , per quas beneficiorum memoriam tuentur ceteri , gratiāmque persoluunt : diem hunc suo nomine festum atque sollemnem , consecratum volunt tanti prædicatione muneris ; ciuilēmque pacem Galliæ restitutam , Ludouico XIV. Regi Christianissimo , Regi Pacifico , per me gratulantur .

Pulcrum , & illustre Pacifici nomen est , Auditores ; plena deliciarum appellatio , plena dignitatis : atque vt nulla cæli facies plus ostentat decorum atque pompæ , quàm quæ serena & clemens est ; sic nunquam est imperij maiestas augustior , quàm cùm suavitate illâ & quasi serenitate pacis ornatur . Popularis

hic titulus est, idémque Diuinus; quo laudes principum omnes, & splendida vocabula, veluti sole minorum ignium lumina, continentur: vt qui Pacificum Regem dixerit, idem & patrem patriæ, & populi delicias, & optimum principem, & pium, & felicem appetet; nomine vno, tot ambitiosa nomina repræsentans.

Cùm autem est nomen illud per se glo-riosum principibus omnibus, à quibus bella quæuis sedata fuerint: tum iis profectò, qui ciuilia restinxerint, eò glorioſius; quô & diffi-ciliora hæc ad profligandum, & reipublicæ funestiora sunt. Externis scilicet in bellis in-certa ferè victoria est; in domesticis nunquam non certa clades: illa viribus geruntur robu-sti, ac florentis imperij; his conficiendis quæ ſuppeditentur ab eo regno vires, quod omni ex parte concuſſum & fractum eſt? Illorum flamas extingueſe conatur populus; horum accedit: vt meritò dixerim bellis ceteris e-xerceri rempublicam, intestinis interimi; ſublatis illis recreari pacem à morbo, his op-pressis ab interitu reuocari. Quid enim om-nium vis atrocitasque bellorum efficere ſolet, quandiu cum peregrino tantùm hoste con-fligitur? pacis integritatem imminuit, pacem

A ij

ipsam funditus non tollit. Regnat interim in sinu reipublicæ, incolumis & vegeta pax; dum extremis in finibus, & limite quodam imperij, tanquam summâ cute aliquot vulneribus delibata, perstringitur.

At cùm ciuilia signa sublata sunt, tum glicit penitus, grassaturque pestis in intimum admissa corpus: nullum paci perfugium relinquitur; nulla vacua sedes ab importunitate bellorum, quæ veluti arce occupatâ imperij, longè in eo latéque dominantur. In illa rerum perturbatione pacem vbiique requiro; ab vrbe, ab agris, à prouinciis pacem repeto: nusquam nisi peremptæ pacis tristissima monimenta reperio. Periisse in vrbe pacem, armorum tumultus fragorésque resonant; abesse ab agris, direptio, vastitas, solitudo, silentium ipsum loquitur; extinctam esse in prouinciis, incendiorum fumus, tanquam ex illius rogi reliquiis erumpens, admonet. Ipsa, quod superest, priuatarum ædium penetralia subeo; fratum sinum exploro, parentum pectora perscrutor: hinc quoque pulsa pax, & eiecta est; neque ciuilia vnquam arma commouentur, quin & fraterna, & his detestabiliora sœuant. Quot in regno prouinciæ, quot yrbes, quot tecta, quot late-

P A N E G Y R I C V S.

5

bræ sunt: in tot veluti membra , misera pax
diuulsa & distracta concerpitur. H̄ic iacet ca-
dauerum aceruis oppressa , h̄ic obtrita & ob-
ruta ruinis vrbiū , h̄ic mersa cæde ac san-
guine,h̄ic bustis adhuc fumantibus consepu-
ta. O pax! ô deplorata pax ! reuocare te hoc
rerum statu , & ex illis bellorum stragibus
excitare, cuius tandem nisi Diuinæ virtutis
ac felicitatis erit?

Tuæ, LVDOVICE , fuit & virtutis, & felici-
tatis: hoc virtuti felicitas concessit , felici-
tati virtus elaborauit. Optabamus tibi pue-
ro, neque tam commodi nostri cauſſā, quām
gloriæ tuæ optabamus, vt externa, quæ ge-
rebamus, bella componeres : sed hoc , & v-
num precari tum in domestica tranquillitate
poteramus , & puero precabamur. Adole-
ſcentem maior à bellis ciuilibus laurea mane-
bat: parabat nobis tristiora illa tempora, vel
fati nostri vis, vel tui ; vt ex iis insignius tibi
victoriæ decus existeret: vt iure omnium o-
ptimo Pacificus dicereris , hoc est, pacis pro-
creator & parens; quam, cùm funditus periif-
set, cùm nulla eius vestigia supererent, Gal-
liæ reddidisses. Exspectabamus, languentem
& infirmam à te recreandam ; mortuam ex-
citasti : vt qui miraculo vitam ingressus es ,

A iiij

6 LUDOVICO XIV.

miraculo imperij primordia consecrare.

Quæ Ludouici laus cùm sit clarior, quàm ut eam obscurare vel liuor obtrectando possit, vel ego assentando velim: vt eam ne quis maiorem fieri dicendo putet, & amplitudinem ab orationis ambitu quærere; verbo uno ingentem panegyricum absoluam: Bellum ciuile flagrabat, Ludouicus extinxit. Breuis, & contracta laus; sed eō maior, quod breuior: tuta laus, & secura, quam neque falsi coarguere quisquam in tam recenti memoria potest; neque verbis exaggeratam, in tanta dicti breuitate criminari. Bellum ciuile flagrabat: quis incendij non meminit? Extinxit Ludouicus: quis beneficio non fruiatur? Omnium igitur est descripta, & infixa mentibus, Ludouici laudatio: eiúsque obliuisci non possunt, quin & recentis belli recordationem, & præsentis securitatis sensum amittant.

Verùm vt æstimetis certius, quantum ex hoc pacis beneficio, solidæ veræque gloriæ Ludouico accesserit: perpendite, quæso, mecum, quàm spissum & arduum opus esset; tum quàm præter spem omnium, quàm perfectè, quàm celeriter ab adolescentे principe absolutum sit, admiramini. Vexabatur Gal-

lia iis discordiis, contentionib^{usque} partium, quæ cùm pupilli Regis vexassent tempora, tum multo sunt grassatæ funestiùs, cùm is suæ tutelæ fieri per ætatem cœpit, ipse iam imperij tutor, eiúsque habenas per se modarari. Ut enim sub coronæ signi cælestis ortum consurgere venti, ac tempestates solent: sic fatale videtur esse nouis principibus, vt cùm ostendere se regno incipiunt, ac siderum instar exoriri, tum maximè populorum motus, turbæ, seditiones excitentur.

Quam labem illis regnandi primordiis tantopere infestam, cui tandem caussæ adscribamus? An naturæ rerum, quâ fit ut infirmitiora rerum omnium initia fint; & regni, perinde atque vitæ, prima ætas tenerior quodammodo minúsque robusta, concuti faciliùs possit? An populi ingenio, qui ferox esse solet, ac dominatus impatiens; similisque immitis belluæ, quæ cùm facile priori domino, à quo fuerat mansuetacta, pareret, ab altero deinde tractari se, nisi aliquo vsu condocefacta, non patitur? An caussis aliis abstrusis penitusque latentibus, quæ nos fato tristissimo, & immisis ab irato numine calamitatibus, exercuerunt: vt siue casu, siue errore quodam excitata incendia, magis deinde ac ma-

gis ad perniciem nostram exitiumque creuerint. Creuerunt enim uero ignes illi, arseruntque sic, ut breui tempore regni partes omnes pestis rapidè dilapsa peruerserit.

Quàm breui locata ubique ciuilia castra sunt! quàm celeriter collecti ingentes exercitus, munitæ arces, occupatæ prouinciae! qui concursus amentium ciuium! qui cùm antè tot votis, tot conuiciis pacem efflagitas-
sent, iam cæco furore præcipites, armis spon-
te correptis, totâ Galliâ pacem extermina-
bant. Ij porrò contrariarum partium duces
erant, quorum auspiciis despensa & oppi-
gnerata victoria videbatur: eâ virtute duces,
quam fortuna nunquam deseruerat; eâ fortu-
nâ, quæ nunquam sine virtute pugnauerat;
eâ famâ, quæ citra pugnam vincere solo
nominis terrore poterat.

Aderant magna belli præsidia, magnæ ac
formidolosæ vires, partim collectæ domi-
strenuis & operosis conquisitionibus; partim
ab hostibus, summissæ primū, deinde pa-
lā magno apparatu subministratæ, eaque
pompâ, quam incertum erat, an triumpho
suo, an funeri nostro pararent. Imminebant
iidem foris, & in fines nostros incursabant am-
plissimis exercitibus, quos immensis opibus
et

& superbissimo delectu , tanquam ad supremam & decretoriam diem conscripserant. Ardebamus domi , obsidebamur foris. Nauim intueri videbar , quam intus ignis depascitur , extrinsecus procellæ ac turbines exagitant : vt eam neque à flammis seruari tempestas , neque defendi à tempestate flammarum patiantur : cíque sit proinde dupli simul exitio pereundum , incendio & naufragio.

Nihil autem erat in hac calamitate tristius , quām quod eam obstinatus ad perniciem populus adamaret. Populus naturā mitis & tractabilis , quo nullus est in orbe terrarum ad regum venerationem propensior , eo furore corruptus , eā vesaniā præceps actus est : vt efferratus repentina quodam impetu , & ab humanissimis moribus ad incredibilem immanitatem occultā ignotāque vi traductus videtur. Id nimirum visuuerit , vt quo quisque facilior & obsequientior est , eo sit deinde , cū semel reuerentiam excusset , ferocior : neque possit mansuetudo summa , nisi summo furore superari. Vix enim se putat nisi maximis de caussis irasci potuisse , quisquis suæ sibi lenitatis conscientius est : neque modum voluntatis furori ponit , ne videatur mediocriter

B

læsus, si leuiter vleiscatur. Accedebat diuturna vœtigallum impatientia, quæ non tam regum voluntas, quam temporum necessitas imposuerat: ex quibus concepta sensim iracundia, multisque annis collecta, leui accedente caussâ, tota effusa est.

Hos optimi populi furores cùm mirarentur sapientes plerique, cùm animaduerterent, non esse Galliæ proprium, sed terratum omnium commune fatum illud, quod commotis vbiique seditionibus atque turbis, omnia permiscebat; vixque regionem ullam esse, quam iisdem aut disturbata penitus, aut vehementer agitatam non cernerent: eò sunt tandem adducti, vt concursum quendam siderum crederent esse factum, quæ populos omnes ad illam insaniam, quam arcanis, tam validis impulsionibus concitarent. Facebat autem illa stellarum quasi diuinitas, quæ naturarum omnium fata contineat, & decretis suis humana ipsa consilia voluntatésque moderetur. Micant ignes illi, non cæcis ardoribus incendunt; ducunt animos, non durâ necessitate rapiunt: adigant brutas animantes, compellantque certis & nunquam irritis impressionibus; hominum voluntates non nisi liberis conditionibus, & inuitamentis

quibusdam illectas sollicitant. Fit illud tamen, vt cùm hominum magna pars, pecudum in morem, vnis insueuerit sensibus, ac cæcis animi commotionibus parere, eò ferme ruat præceps populus, quò impulsus illi cælestes quasi precariò inuitabant: esse etumque adeo tum temporis est, vt ybique dominata sit vis illa imperiosa siderum; si quantum erat, quæ ad defectiones, ciuilésque discordias induceret.

Sed inuentus est in Gallia sapiens, qui dominaretur astris, eorumque vim sua virtutē reprimeret. Fuit, LUDOVICE, felicitas tua fatis illis astrorum potentior: sidus ipse fuisti laboranti imperio, cuius benignitate, ceterorum inclemencia siderum, manansque ab iis in terras contagio superata est; cuius luce, discussa tandem est illa caligo temporum, quam stellæ maligniores induxerant: propitium felixque sidus his iactatæ fluctibus Galliæ, quæ naufragium erat iam iamque factura, nisi tempestatem aspectu clementiore pacasse.

Cui nostrum spes tum temporis erat, Auditores, summam rem à tam turbido statu, ad tam quietum & compositum breui esse reuocandam? Quis cùm hanc tranquillitatem,

B ij

résque domi pacatissimas intuetur, non se in alias quasdam oras deportatum putet? se in eo credat imperio versari, quod suis propè conuulsum sedibus, tam ingentes ruinas paulò antè traxerat? Conferte, Parisienses, conferte rerum hunc statum, hanc regni faciem, hanc quietem vrbis, cum illius perturbatio ne temporis, quo vestra vobis Lutetia carceris loco erat: cùm neque pedem extra pomœrium efferre paterentur effusi prædonum exercitus, hostiliter vbique grassantium; neque in vrbe tutò commorari sineret manus egentium & perditorum, quæ hic vna regnabat: qui nec à publicis ædibus incendium, nec vim à senatu, nec cædem à ciuitatis proceribus abstinebant. Quis vestrūm ædes suas tutas credidit, cùm ardentem vrbanam basilicam intueretur? quis vitæ suæ non timuit, cùm optimatum interneciones, & publica parricidia cerneret? Tandiu licebat viuere, quandiu sicariis libebat: hos libertatis vitæque vestræ habebatis arbitros, apud quos nocens erat, quisquis ciuis optimus videbatur. Quid dicam coniunctissimorum hominum perfidias? quid prodiciones domesticorum, fraudes, suspiciones, pauores perpetuos, quibus fiebat, vt nihil quisquam ne suis quidem

in laribus securum duceret? Inter tot pericula hoc timebatis magis, quod incertum vobis erat, quid omnium maximè timeretis.

Interim autem, cùm è prouinciis omnibus, quas eadem mali vis premebat, Lutetiam multi, tanquam ad pacis asylum aspirarent: vix attigerant iidem Lutetiam, cùm illis spectaculis attoniti, iam prouincias suas desiderabant: vicissimque si qui elusis vigilibus ex vrbe proripere se, & tanquam ex ergastulo cuolare potuerant, cùm eosdem vbique luctus, eadem latrocinia, direptiones & cædes easdem intuerentur; eos continuò desertæ Lutetiæ pænitiebat. In illa tam communi Galliarum calamitate, quemcunque infederant locum, is omnium miserrimus videbatur: ut in ægro & fracto malis corpore, ea demum pars vna omnium vehementissimè dolet, in quam ægrotus incumbit. Erat autem illud in tot Galliæ morbis luctuosissimum, quod in tanto corpore, pars esset ex omnibus nulla, quæ medicinam vel facere, vel pati vellet; omnes exitium sibi ac perniciem per aliarum exitia molirentur.

Emersisse Galliam ex his fluctibus, superesse tot malis incolumem; neque stare tan-

B iij

tum , sed omnibus antestare , quam omnium iniuriis nuper expositam videbamus , oppugnatam ab hostibus , à suis diuexatam , à nemine , præterquam à Ludouico defensam , & inuitam ab eo seruatam esse : quî poterunt hæc à posteris quondam audita fidem obtinere , quam impetrare à nobis , etiam præsentia , etiam oculis explorata , vix possunt ?

Quæ dum sapientissimè curarentur , quām multos interim audiebamus in omni congreßu , in circulis omnibus , rerum administrationi obtrectantes , sua interponentes summis de rebus iudicia , deplorantes regij consilij cæcitatem ; exclamantes , præposteras iniri vias restituendæ in integrum reipublicæ ; his artibus , hac rerum gerendarum formâ perdi Galliam , ac funditus euerti . Assuecite parere , populi , assuecite arcana regum consilia venerari , quorum non potentia tantum estis , sed etiam sapientiæ subiecti : cùm vtramque regendis vobis à Deo vicariam acceperint . Sed nimirum est iniquior ferme populus iis , quæ supra se posita cernit : atque ut in cælo , siue sudum , siue nubilum est , aliquid occurrit semper , de quo morosiores quidam expostulent : sic in imperio nunquam non aderit , quod praua & distorta in-

genia conquerantur. Quid quòd magnos se nonnulli credunt, si magna fastidiant? Et, quod aiebat ille, *ut potentur sapere, calum vituperant.*

Illis consiliis, quæ criminabamini, ô censores egregij temporum, vicit Rex Pacificus: & ita vicit, vt eius magnitudinem victoriæ non possitis, nisi ex Galliæ amplitudine metiri; quæ cùm tota periisset, tota seruata est, & profligatis, penitusque consumptis armis ciuilibus, ab ipso recuperata. Quid enim? vbi domesticorum tumultuum vlla vestigia? vbi defectiones prouinciarum? vbi potentium coniurationes? vbi pars vlla, quæ à principis imperio desciscat? Recognosce teipsam, Gallia: circumspice, quâquâ pates: lustra curiosè partes omnes, num qua tranquillitatem tuam intus aura conturbet; num quæ ciuilium copiarum reliquiæ apud te supersint; num quas arces factio vlla seruauerit; num quod castrum, quò respectare seditio possit; num quem aggerem, quo se turbulenti ciues protegant; num quod toto regno propugnaculum, quod regiis armis simul non fuerit, & paci ac concordiæ patefactum. Nam fines ipsos non moror: qui sicubi habentur infesti, dum in alios vicissim incurrimus; id externi

belli totum, non ciuilis est. Hoc dico, nihil domi nisi pacatissimum superesse.

Et hanc quidem Galliae salutem à Ludouico restitutam hoc admirantur impensiùs gentes ceteræ, quòd damnis experiuntur suis, quàm insanabiles illæ plagæ sint, quas à ruinis ciuilibus regna patiuntur. Hispanicæ ditioni Gothalandia & Lusitania subtraetæ sunt: altera belli theatrum esse ex illo non desit; alterius ne recuperari quidem particula potuit. Britanniam coniuratorum arma furorésque turbarunt; regi suo tota periit. Iisdem Polonia motibus concussa est; nondum sedatis sunt: iisdem agitatum est Turcicum imperium; adhuc perseuerant. Vna omnium Gallia, cùm periculosisssimè quateretur, firmissimè stabilita conquiescit; vna plenè à principe suo ac perfectè recepta, pristinóque imperio placidissimè subiecta est: vt in tot prodigiis nihil sit admirabilius, quàm tantum regnum tam breui tempore fuisse recuperatum.

Sed admirationem omnem id superat, quòd citra ullam vel conuersionem reipublicæ, vel labem religionis, recreatis simus, à bellis ciuilibus, quæ vix vñquam antea, vtrâque incolumi sedari potuerant. Quid ab iis patiatur forma reipublicæ, Roma didicit, cùm

cum domesticas eius discordias, & diuturnam tot bellorum iactationem ita composuit Augustus; ut à multorum potestate ad vnius dominatum omnia descuerint. Quàm fint eadem pestifera religioni, experta est Gallia intestinis superioris sæculi bellis, quorum tristes reliquiæ sunt, Caluini posteritas in Christianissimi imperij sinu ac gremio secura. Ac ne ab illa vel locorum vel temporum longinquitate arcessere operosiùs exempla necesse sit: quanta recèns est Britannicum in regnum per ciuiles inducta motus, reipublicæ simul religionisque mutatio! Neutrius Gallia detrimentum sensit, Auditores, sed ita quietem à perturbatis illis temporibus recepit, vt nihil vel de reuerentia principis, vel de sanctitate religionis amiserit. Quando enim Regis via est firmior potestas? auctoritas maior? Cui quidem ignominiosum non fuit iis motibus concuti, sed iisdem non euerti gloriosum. Profuit tot opibus, tot conatibus, tantâ vietantique impetu oppugnatam esse; vt inuitum esse in Gallia Regem, & populus, & Rex ipse doceretur.

Religioni verò adeo nihil de sua integritate decessit, vt nouus etiam illi nitor, nouum pacis & concordiæ decus, sedatis Iansenianæ

C

controversiæ tumultibus, accesserit. Pacificum se Ludouicus non credidit, nisi geminæ pacis auctor esset; alterius quam Regno suo, cuius parens est; alterius, quam Ecclesiæ, cuius est filius, restitueret. Et utramque certè reduxit, alteram suo, alteram summi religionum interpretis arbitrio sanctam: illa victoriæ fructus, hæc pietatis fuit, utraque summæ felicitatis. Quod enim respiramus ab iis turbis, quibus exercita religio annis amplius decem, magno bonorum omnium luctu, metu maiore fuerat: tuum, L V D O V I C E, munus est, qui tuis ad Pontificem Maximum litteris, precibus, auctoritate, è Vaticano pacem tanquam è cælo deuocasti. Constantini Magni pietatem imitatus es, qui hostibus terrâ marique dominis, pace vniuerso imperio partâ, reddendam quoque religioni pacem, compositis eius dissidiis putauit; & Ecclesiam ab Arianorum peste, Ecclesiæ ipsius auctoritate vindicandam. Sed Constantino in hoc felicior es, quod is Arianam hæresim ne sic quidem oppresserit: tu, cum nemo se contumacem & refractarium ad hanc diem videri velit; sperare meritò possis, non sotitos esse tantum, sed etiam extintos ignes illos, quos Batauica nouitas accenderat: tutaque apud nos fo-

re tum ab impudentibus calumniis, tum à futilibus interpretamentis Romana oracula, quæ tuis edictis protecta sunt. Quòd si quis existat vnquam adeo vecors, vt neque pontificia fulmina, neque regia vereatur; si quis Galliarum Episcopis tam insolenter illudat, vt eius patrocinium doctrinæ suscipiat, quam illi communibus ad sanctissimum Patrem litteris, & excerptam è Jansenij libris agnoscunt, & nouam appellant *hæresim*, oppressamque gratulantur: huius nos, si quis tamen hu- iusmodi prodibit vnquam, non tam reformi- dare impetum debebimus, & concessæ diui- nitus paci quidquam metuere, quàm vel ri- dere hominis fatuitatem, vel impietatem & sacrilegium execrari. Excisa est enim profe- ctò, excisa funditus illa Babylon, arx illa dis- cordiæ, illa domesticæ pacis inimica: cuius si qua sunt tamen audita murmura; fragores ij sunt, ingentis ruinæ testes; singultus extremi sunt morientis belluæ, eoque vehementius v lulantis, quo funestiore plagâ percussa est.

O pacem! auditores, pacem Ludouico glo- riosam! & eo certè priore alterâ præstan- tiorem: quo & sanctior est, & longius per Christianum orbem latiusque diffusa. Cùm enim aliis non sit inclusa finibus, quàm qui-

C ij

bus est Innocentij auctoritas circumscripta : peragrauit scilicet regna omnia , oras terrarum omnes obiit ; vt quorum vel disiunxerant animos nouitates istæ , vel disiuncturæ propediem erant ; eos aut recrearet inductâ concordiâ , aut à præsentibus funestissimorum dissidiorum periculis defenderet . Immensa & infinita pax ! an ciuilis dicenda , quæ ciuium composuerit discordias ? an externa , quæ aliarum etiam gentium vel restituendæ , vel confirmandæ tranquillitati prouisa sit ? Vtramque certè laudem pax ista ferat : vt eius auctor Ludouicus vtrâque decoretur .

Verùm quid religioni , quid populis ceteris , orbique terrarum princeps noster hac pace contulerit , persequentur ornatiùs alij , quibus & otij plus erit , & copia dicendi beatior : nefas est patriæ fines huic orationi præfixos prætergredi ; cui tum plenè ciuilis est restituta pax , cùm religionum diuortia sublata sunt . Nunquam enim quietum imperij corpus est , dum anima imperij religio luctatur : nunquam est sine motibus respublica , dum hoc eius fundamentum concutitur . Rara inter eos concordia , qui de re tanta dissentiant . Sustulit Ludouicus illam domesticorum bellorum scaturiginem , illum publici incen-

dij fomitem , ex quo ciuiles flamas intel-
ligebat posse mox tenuissimis igniculis susci-
tari.

Satis autem non fuit Pacifico principi , pu-
blicos bellorum motus comprimere : nisi pri-
uata quoque arma , & internecinam singula-
rium præliorum insaniam , quâ potest aucto-
ritate maximâ , & grauissimis interdictis com-
pesceret . Partum ipsi fuit , publicæ rei pacem
restituere : nisi & eam privato cuique redde-
ret . Hanc domesticæ quieti debere se acces-
sionem credidit : & debebat certè , vt pleno
beneficio frueremur . Pariter enim ciuile bellum
simultates infinitas , grauissimâque odia , quæ
conflata mutuis iniuriis & offensionibus , sic
hærent exulceratis animis penitus infixæ : vt
ne publicâ quidem conciliatâ pace & concor-
diâ deponantur . Quæ si armis vlcisci cuique
fas esset ; redintegratunt potius , quâm con-
fectum bellum ciuile videretur . Quis enim hæc
prælia non videt , quamquam minore apparatu
ac strepitu , longè tamen tristiori cæde ac car-
nificinâ geri ? Ac nimirum similes mihi viden-
tur publicæ dissensiones lati cuiusdam incen-
dij , cuius erumpentes flammæ , & ædium fa-
stigia superantes , eminus , vt succurratur , ad-
monent : cùm tenebrioſa illa inter priuatos

C iii

certamina , instar sint cæcorum latentiumque ignium , qui eam , ad quam adhæserunt , materiam , quo carpunt occultius , hoc fœdius lentâ malignâque peste consumunt . Componantur bella externa , ciuilia opprimantur : bellum tamen omnium atrocissimum usque cù vigebit in Gallia , dum illa gladiatorum amentia coercentur : bellum æternum & inexpiable , quod nullâ vñquam pace componi , ac ne induciis quidem vllis intermitti potuit : bellum insidiosissimum , quod nunquam strages edit , quām in summa pacis & otij tranquillitate , tristiores : bellum funestissimum , quo profunditur sanguis generosissimus , cùm in ceteris magna sēpe vilissimi iactura fiat . Illam parricidiorum diram ac detestandam libidinem , illas sicariorum furias , illas domestici belli reliquias , quòd recentibus edictis percussit Rex Pacificus , communice regibus aliis laude fruitur : sed quòd pœnas constituit multò quām antè grauiores ; quòd edicta illa , non monitoris vllius expressa consiliis & hortatibus , sed suâ sponte meditata conceptaque conscripsit ; quòd eorum se tam acrem vindicem , & tam inexorabilem præbet , vt iis aspectu suo & comitatu interdictum velit , qui pro istius flagitijs reis

iii 3

deprecatores accesserint; hoc verò quām insigne, tam peculiare Ludouico nostro decus est.

Quām verò istud quoque vnius est eius proprium! quām à nemine usurpatum priùs! quām ex sincero vehementique amore pacis ac concordiae profectum! quod, ut regiam suam paci dedicaret, domesticos aulicosque omnes, hoc est, totius Gallicae nobilitatis florem, iureiurando adegerit, nunquam se, quisquis læderet, quisquis lacefferet, ad certamen singulare conducturos. Seorsim aduocabat singulos rex optimus; amabat blandè impetrare, quod seuerissimè per legem imperauerat; chirographum etiam exigebat, cuius fide obstricti tenerentur: eosque tum demum agnoscebat suos, cùm hac cautione obligatos cerneret. Cuius formulam iuris iurandi, quām multi etiam è regio exercitu subscriperunt! Accersebantur alij subinde atque alij ab humanissimo principe, excipiebantur benignè, laudabantur prolixè, sacramento denique rogabantur. Obtinebat Ludouici benignitas, quod extorquere suppliciorum omnium terrores minimè potuissent. Repecebant illi castra pacatoribus in suos animis, in hostes acrioribus. Rex unus, & amorem pacis, & belli ardorem simul impresserat.

Princeps verè Pacificus, qui etiam inter arma, etiam in cæde ac sanguine, tam benignos mansuetosque sensus excitat. Princeps, animi clementiâ, suauitate morum, affabilitate sermonis, oris ipsius lenitate pacificus: meritò dicendus *Princeps pacis*, & à Deo in tantæ communionem laudis adscitus.

Hæc cùm reproto ipse mecum, cùm cetera Ludouici Pacifici decora & ornamenta otiosè contemplor, sic statuere soleo: Principes ceteros, qui pacis affectasse laudem, aut quoquo modo etiam meruisse sunt visi, nequam esse cum eius vnius gloria conferendos.

Pacificus litteris omnibus atque linguis prædicaris, Salomon: fruere certè hac laude, quam tibi Diuina quoque auctoritas asseruit. Et concessio tamen diuinitus otio, ad umbratilis ac delicatae vitae segnitiem abusus es; ac speciosum pacis nomen videri poteras desidiæ tuæ prætendere. Principi nostro tranquillitas publica, non inertiae nutricula, sed industriæ fructus, ac fortitudinis fuit: non in pace delicias, sed pacem in periculis quæsivit, diuturnis laboribus, itineribus molestissimis, eaque vel locorum, vel temporum difficultate, ut ad extruendas eius mensas,

non

non iam regales epulæ, sed simplex & popularis annona quaereretur. Tanti erat Ludo-
uico, dummodo suos restitutâ pace seruaret.
Nunc verò quam omnibus quietem, ac tran-
quillitatem peperit, eâ propè vnius non
fruitur: sed exhaustis bellis ciuilibus, con-
uertitur ad externa, vt Galliæ sit idem &
Europæ pacificator. Ab armis non discedit,
quibus nulla sunt præsidia maiora pacis: ne-
que regem esse se putat, vt beatus sit, sed vt
beatos faciat.

Honestè in pace atque otio vixisti, Theo-
dosi Iunior: sed tibi parum glorioſo illustrí-
que otio, cùm illud acceperis felicitate tem-
porum, non tuâ virtute quæſieris. Beatus
princeps, qui cùm in pacatam ætatem inci-
disses, quietem in ea placidissimè tenuisti;
publicæ tranquillitatis heres potius, quam
auctor; pacificus eâ re viſus, quia pace frue-
baris; conſeruator habitus reipublicæ, quia
pacem, quam in ea naclus eras, bellicis furo-
ribus non turbasti. Tyrannorum hæc laus
est, eorum videri imunerum auctores, quæ
non eripuerint. Ludouicus non reperit paca-
ta omnia, sed fecit: eius beneficium est,
rerum omnium suauissima pax, tanquam è
longinquo reuocata: diſſenſiones, concordiâ;

D

belli pericula, securitate pacis; armorum tumultus, domesticâ tranquillitate commutauit: Soli hac in parte similis, qui cùm oriatur in nubilo, caliginem deinde omnem suâ luce dispellit.

Henrice II. pacem fecisti tu quidem, sed externam: quæ an satis honesta, & à sapientibus probata fuerit, in præsenti non quæro. Volo redemptam iniquis conditionibus non fuisse, volo decoram, volo te dignam vide ri. Quid tamen si te, si Philippum II. Hispaniæ Regem, quicum pacem illam pepigisti, politici quidam affirment, pessimè hoc facto de regnis vestris, pessimè de pace ipsa meritos: nunquam scilicet domi tutiorem esse pacem, quàm cùm foris bellum versatur: atque ut subterraneis ventis pandenda spiracula sunt, quibus crumpere illos præstat, ac perflare terras, quàm easdem intestinis motibus conquassatas euertere; sic turbulentis ingeniis pandendam esse viam ad bella quædam externa, in quibus eorum furor, minore danno, quàm in patriæ sinu occupetur. Sed nihil de tua illa laude deteratur: parum iij consulti sint, qui pacis tuendæ caussâ prodi pacem volunt: gloriosum ducatur iis etiam vulneribus mederi; atque ut in principis, ita

in patriæ sanitatem, nihil leue sit, parvumque pendendum. Quid illud tamen est, in quo tam insigniter elaborasti? Bellum, inquis, quod patria cum hoste gerebat, composui: Beneficium est, sed hosti, patriæque communne. Pacem in Gallias retuli: retulisti? è Gallicarum gremio pax non discesserat: vigebat in urbe, florebat in agro, ubique colebatur. At huic tamen bella, quamvis externa, incommodebant: bene est: laboranti paci optimatus es; Ludouicus inter mortuam & iacentem excitauit. ut propè dixerim, tantum inter te & illum interesse, quantum inter medicum & Deum.

Henrice Magne, an bello, an pace maior? utrobique certè maxime: tu superiorum principum laudes illas complexus es unus, easdemque superasti; qui & vixeris in otio regaliter, & pacem non acceperis ab alio transmissam, sed tuâ virtute confeceris. Quam si domi forisque peperisti, prius tamen constituesti domesticam, ut externam deinde gloriosius securiusque compones. Tuis igitur vestigiis nepos ter maximus ingreditur: alterum pacis tuae decus, recens obtinuit; alterum spes est minore, quam à te relatum est, spatio temporis obtainendum. Interim ta-

D ij

men in hoc vinceris, quod ciuum paci à te
constitutæ, religionum dissidia superfuerint;
hic & recentes Ecclesiæ discordias, & ciuale
bellum, eodem ferme puncto temporis op-
presserit. In eo cedis, quod pacem cruento
bello, multaque cæde obtinueris; hic nul-
lis ferè nisi pacificis artibus eandem compa-
rauerit. Tibi pugnæ tres magnis cladibus
committendæ fuerunt, fortuitis præliis quo-
tidie dimicandum, expugnandæ vrbes, va-
standæ prouinciæ; perdenda propè Gallia, ut
Gallia seruaretur. Ludouicus expeditis ar-
mis, non ad belli sævitiam, sed ad pacis se-
curitatem, nullâ magnarum vrbium vi captâ,
signis vix ullo iusto prælio collatis, incredibi-
li ciuilis sanguinis parsimoniâ vicit: victoriæ
præmium pacem retulit; hoc maiori laude,
quod non tantum in componendo bello, sed
etiam in gerendo, pacificus fuerit.

Neque tamen incusandus Henricus est,
quod tot stragibus, viam sibi ad domesticam
pacem munierit: sed Ludouico, quod eam
pene incruentâ victoriâ restituerit, gratu-
landum. Habet enim hoc ciuilis ille furor,
vix ut opprimi potuerit vnquam, nisi multo
sanguine satiatus; neque pax certa componi
soleat, nisi pars altera, ingenti clade franga-

tur. Nimirum nunquam est illud quām in domestica dissensione verius, belli filiam esse pacem: atque ut ex rudi & incomposita mole pulcrum hunc ordinem rerum emersisse oportuit; ita fati quādam necessitate fit, ut ex summa perturbatione bellorum, tranquillitatis, & concordiæ suauitas efflorescat.

Sed Ludouici cauſſā, violata illa lex est: densissimæ caligini depellendæ non fulminum lucem attulit, quæ procellam augent potiūs, quām sedant: sed affulſit instar benigni ſideris, nubēſque omnes liquido & sereno lumine, nullis ruinis, nullâ violentiâ, diſcufſit. Armorum fulgores vidimus, sed quos vix vlli fragores, fulminūmque iactus exceperint: aut si qui fortè viſi ſunt, vel terrendis animis, vel domandæ peruicaciæ neceſſarij; incredibilis eos humanitas eſt, & clementia conſecuta. Pro poenis omnibus, quas repte- re pro victoriæ conditione poterat, veniam & impunitatem, iniuriarūmque obliuionem perpetuam, etiam edicto ſancitam voluit. Bello fractis, pacem concessit; diuturnā iatione vexatis, tranquillitatem reddidit; rerum omnium difficultatibus pressos, in priora commoda reſtituit: ut victoriâ frui non tam victor, quām vieti ipſi viderentur.

D iiij

Quòd si Romanorum ille mos apud nos obtineret, vt ciuis vnius seruator, eâ coronâ donaretur, quam honore coronis ceteris præstare censebant: quis coronas ciuicas, quas hoc bello, seu potius hac pace meritus es, enumerare, LVDOVICE, posset? seruasti rebelles, quos ne perderes, remissiore marte persequi, & propè sine clade vincere volui-sti: seruasti viatos, de quibus vnâ lenitate ac misericordiâ triumphasti: seruasti omnes, à quibus belli ciuilis perniciem depulisti. Coronam igitur ciuicam, quam accepisse Augustus à genere humano futiliter & assen-tatoriè dictus est, verè profitebimur, te hac victoriâ, de Gallia meruisse. Habendus ita-que tibi populi census est, non vectigalium caussâ, quæ plebs vna pendit; sed coronarum, quæ tibi etiam à nobilitate debentur. describenda totius regni capita sunt: vt in-telligamus, quot coronæ sint vnicō seruatoris capiti tribuendæ.

Accessit autem victoriæ tuæ decus alterum: quòd dum populum seruares, imperij quoque tui maiestatem tuereris; quæ cum populi sa-lute, pace, concordia, coniuncta est. Nam quæ tandem, in illa confusione temporum, regi superesse maiestas, quod imperium, quæ

auctoritas potest? Conscriptit edicta; non paratur: tributa exigit; non impetrat: educit copias; aduersæ aliæ procedunt. Hoccine est, amabo, regem esse? Regem sine fisco, sine ærario, sine populo; regem sine regno. Ac mihi quidem videtur huiusmodi rex formosum esse caput fœdi lacerique corporis, cuius membra omnia vel consumpta tabe ac macie, vel cooperta tetris ulceribus & sanie fluentia, vel fracta denique & imminuta sunt: quibus membris si caput imperet, non obsequuntur; si prodeat, sunt dedecori: omninoque præstaret non esse caput, quam istiusmodi corporis caput esse. Vindicauit se Ludouicus ab hac iniuria: curauit totum imperij sui corpus, quod lues illa domesticæ discordiæ pessundabat; vnâque & regno pacem, & sibi regnum asseruit.

Tum enim uero regnare mihi videntur principes, & decus imperij retinere, cum pacatis & concordibus populis dominantur. Quanquam enim insit illis maiestas sua semper, quæ nullis iniuriis temporum eripi, nullâ iniquitate fortunæ extorqueri potest: latet nihilo minus eius splendor, quandiu cæcis illis tumultuum factionumque nubibus ac procellis inuoluta est. At cum tranquilla om-

nia & serena sunt: tum demum tota se maiestas principis explicat, & plenâ luce resplendet. Quo factum est quondam, ut serenitatis nomen imperatores, tanquam omnium augustissimum, adamarint. Et verò cùm sint reges Diuinæ maiestatis simulacra quædam, & summi regis imagines mortalibus ad venerationem propositæ: eo certè præstantius imperant, quo perfectius in regnis suis exprimunt Diuni similitudinem imperij; quod in augusto illo pacis domicilio, tranquillitate ac concordia sempiternâ compositum est; ubi, quo ciuium est tutior securiorque felicitas, eo maiestas regnantis numinis est maior.

Hanc sibi formam imperij Ludouicus constitutâ pace, descripsit: neque regem se credidit futurum, nisi regnum, quod lacertatum discordiis ac tumultibus perditum, regni speciem vix habebat, quietum ac tranquillum obtineret. Regnum hereditate prius acceptum; nunc verò & partum victoriâ, & populi suffragiis atque electione delatum. Quid enim? nónne hi regem elegisse ac renuntiasse dicendi sunt, qui cùm non parerent prius, ac regem proinde non agnoscerent, expugnatis tandem à pacifico viatore voluntati.

tatibus , & diuinâ quâdam virtute victis ,
repentinâ conuersione factâ , regiis sese im-
periis vltro subiecerunt ? Ita si non heredita-
rio iure regnaret Ludouicus Adeodatus , re-
gnum victoriâ quæsiisset : si non peperisset ar-
mis ; voluntariis illis conspirantium populo-
rum obsequiis , illâ parendi alacritate conse-
qui potuisset .

Optanda igitur (pacè tuâ Gallia dixerim)
optanda Ludouico erant hæc tempora : quæ
si futura erant aliquando , tam felix haben-
dus est princeps noster , quòd ea fit ad glo-
riæ suæ opportunitatem nactus ; quâm Her-
cules , quòd monstra quæ domaret , repere-
rit . Dolenda fortunæ nostræ tempora , sed
Ludouici gloriæ ac felicitati expetenda .
Quanquam ! orationem hanc meam execra-
retur Princeps optimus , qui gloriam suam
nunquam putauit à populi fortuna esse se-
iunctam .

Gratulabor igitur nobis , vt Regi gratula-
ti impune liceat . Ita est , Auditores , ex illa
calamitate , cuius dissimulare damna non pos-
sumus , fructum cepimus opinione maiorem .
Principem nobis hæc tempora finxerunt ,
vtriusque fortunæ gnarum , vtriusque victo-
rem ; scientem belli , amantem pacis ; quem

E

nullæ terreant vices armorum , nullæ factio-
forum fraudes circumueniant ; principem
non puerilibus deliciis , sed regiis curis &
consiliis innutritum. Cui si prospere omnia
felicitérque , in alta & beata pace fluxissent :
quem hodie principem haberemus ? quâ re-
rum gerendarum industriâ ? quâ cognitione
republicæ : quâ peritiâ bellorum ? quæ nunc
Ludouici laus esset ? hæc vna : Rex est ; Re-
gis filius , Regum nepos , Regiè , id est , lautè
ac splendidè viuens. Qua commendatione ,
quanto hæc maior est atque illustrior : Rex
est , Rex bellator , Rex Pacificus , Rex per-
euntis regni conseruator ?

Quæ Ludouici laudes ita sunt cum nostris
vtilitatibus commodisque coniunctæ : vt
quantam ipsi gloriam ad immortalitatem om-
nem , tantam nobis in posterum securitatem
& fiduciam adpromittant. Nam si qua nobis
procella minaretur , hac essemus vnâ cogi-
tatione securi : Alias vidit tempestates Ludo-
uicus : alios fluctus , ventosque vicit. Quid
formidare possit grandior , qui vix adole-
scens tam formidolosa superauit ? quid eo gu-
bernatore timeamus , quem tam illustre tiro-
cinium videmus in difficillima tempestate
posuisse ? Pacificus est : nihil nobis à bellorum

immanitate metuamus. Bellator est : nunquam est pax , quām sub bellicoſo principe, tūtior.

Hæc , inquam , fidenter vſurparemus : ſi quid deinceps periculi , reſtitutæ à Ludouico ſaluti , & incolumitati publicæ crearetur. Sed fundatior eft profecto , quām vt eam euertere quidquam & labefactare poſſit. Nunquam enim ſolet eſſe regnorum ſtatus , quām poſt turbulentiſſima tempora , pacatior : ſiue id populi moribus tribuendum eft , qui pertæſus armorum , corūmque moleſtiis fractus , reſipuit tandem , & pacis tranquillitatē amare in belli tumultibus didicit ; ſiue prudentiæ consilioque principis , qui quo perturbatior eft rerum facies , hoc acriūs , eas vt componat , & quaſi de integro iſtaueret , connititur. Concufſa igitur eft Gallia , vt firmiūs deinde niteretur : turbata , confuſa , euersa propè eft ; vt reuocata meliorem in formam , & in pulcriorem ordinem reſtituta , nouum decus ornementūmque recipere. Atque vt emendare deprauata tempora Iul. Cæſar non potuit , quin caſtigatiores annos antecederet is , qui conſuſionis annus eft dictus , annus mensium quindecim , anno rum omnium , qui antè fuerant , perturbatis-

E ij

simus; qui cùm ceterorum labem exhauserit, æquabiliorem deinde cursum infecuta tempora tenuerunt: sic necessarius propè Galliæ fuit confusionis hic annus, vt ad eam domesticæ pacis, quâ nunç fruimur, quietem & tranquillitatem aspiraret. Annum egit confusionis, vt fortunatissima sæcula duceret: annum exitio nobis futurum, nisi ex eius ruinis felicitatem nostram Ludouicus excitatasset.

Ex iisdem, L V D O V I C E , gloriam tuam excitasti: gloriam, & bello quod oppressisti, singularem; & pace quam restituisti, pæne Diuinam. Hominum enim est, gerere bella; Dei, componere: aut eius certè, cuius *cor in manu Domini positum*, & ad omnem eius ductum flexibile & obsequens, totum ad consilia pacis & tranquillitatis incubuit. Quod cùm sit à te adolescentे perfectum: quid reliquum tibi laudis fecisti, quod vir aut senex acquireres? Hoc enim obesse gloriæ tuæ videtur vnum, quòd crescere posthac similium decorum accessione non poterit: sed quidquid illustre ac splendidum gesturus es, adolescentiæ tuæ laudibus obscurabitur. Quidquid vineas, quidquid triumphes: paci ciuili restitutæ decus suum victoriæ omnes,

triumphique summittent. Neque verò nos , quantumuis gloriæ tuæ studeamus , victoriā optabimus huic primæ similem , quia simile bellum optare non possumus.

Quanquam! quid tibi victorias optemus , qui perpetuò triumphaturus es : triumphum, inquam , pacis sempiternum acturus : quam meritò dixit veterum quidam triumphis esse omnibus potiorem. Erit autem triumphus ille pacis , non vrbis vnius ambitu inclusus ; sed longè fusus per prouincias omnes , per vrbes , per agros ipsos , quibus est à te tranquillitas restituta. Triumphus sine captiuis , sine spoliis , sine armis : nisi fortè iis , quæ ad lenitatis tuæ commendationem incruenta præferentur. Neque tamen sua pompa ferula deerunt : sed cùm in triumphis ceteris cæde ac sanguine quæsitis ea soleant ostentari , quæ subactis gentibus victores ademerint : in hoc tuo pacifico ea ferentur & iactabuntur vna , quæ seruatis populis tuo sunt munere concessuque donata ; sacra , quæ à profanorum furoribus hoc facto vindicasti ; religio , quam pacificasti ; litteræ ac doctrinæ , quibus otium reddidisti ; fruges , fortunæ , commoda omnia , hoc ipsum quod sine metu spiramus , quod viuimus , quia tui sunt om-

E iiij

38 LUDOVICO XIV. PANEGYR.

nia muneris , pars esse pompæ , triumphi-
que debebunt. Accedent non direptarum ,
sed conseruatarum vrbium simulacra ; non
captiui duces , sed Gallica nobilitas , à tristissi-
ma gladiatorum conditione , tanquam à ser-
uitute , liberata : non descriptus in tabulis ho-
stium numerus , quos cecideris ; sed ciuium ,
quos seruaueris.

Plausuum interim & acclamationum loco ,
vox vbiique vna resonabit , LVDOVICVS PA-
CIFICVS. Non afferentur meditata & prolixia
præconia , quæ vel decantentur triumphantii
tibi , vel in æra & marmora incidentur. Su-
specta tua laus esset , si artificio adulterata ver-
borum , & conquisitis elegantiiis adornata ,
non simplex & ingenua prodiret. Nunquam
micat illustriùs , quidquid est illustre per se-
se , quàm cùm nudum est. Nudæ igitur lau-
des tuæ , nudæ nostræ gratulationes , LVDO-
VICE , prodibunt : & panegyricorum , epini-
ciorum , monumentorum omnium instar ob-
tinebit vna vox : LVDOVICVS PACIFICVS.





UNIVERSITÄTS-
BIBLIOTHEK
PADERBORN

Th
5796